

10 JUL 1998

Mahathir-Taiwan

MALAYSIA BERSEDIA GUNA MATA WANG TAIWAN

KUALA LUMPUR, 10 Julai (Bernama) -- Malaysia bersedia menggunakan mata wang Taiwan dalam perdagangannya dengan negara itu bagi mengurangkan pergantungan kepada dolar Amerika dalam perdagangan luarnya, kata Perdana Menteri Datuk Seri Dr Mahathir Mohamad hari ini.

Beliau berkata kedua-dua kerajaan telah memulakan rundingan bagi menggunakan ringgit dan dolar Taiwan dalam perdagangan dua hala.

"Kita sekarang hanya perlu menubuhkan sebuah pusat penjelasan dan mengadakan mekanisme yang kini belum wujud," kata beliau kepada sekumpulan 19 wartawan Taiwan yang mewakili sembilan akhbar dan tiga stesen televisyen di Jabatan Perdana Menteri di sini.

Dr Mahathir juga menjelaskan mengapa Malaysia sehingga ini tidak meminta bantuan daripada Tabung Kewangan Antarabangsa (IMF) bagi mengatasi masalah ekonominya.

Beliau berkata ekonomi negara-negara yang menerima pakej bantuan IMF seperti Indonesia, Thailand dan Korea Selatan tidak juga menjadi lebih baik daripada Malaysia yang memutuskan untuk tidak menerima pakej IMF.

"Mengapa harus kita mendapatkan pertolongan daripada sebuah pertubuhan yang sebenarnya tidak menolong dan jika kita menerima pakej IMF, kita akan terpaksa membuka pasaran kita kepada gergasi korporat dari negara-negara Barat dan ini menjadikan syarikat-syarikat kita tidak berupaya untuk bersaing dalam pasaran terbuka," kata beliau.

Dr Mahathir berkata sebagai contoh, dalam sektor perbankan, bank-bank tempatan akan ditelan oleh bank gergasi seperti Citibank yang mempunyai aset US\$600 bilion.

" Sehingga ini kita dapat menolak IMF..rakyat masih pergi membeli-belah, perniagaan berjalan seperti biasa, projek pembangunan terus dilaksanakan dan tidak satupun bank ditutup," katanya.

Dr Mahathir juga berkata sukar untuk menjangka bila kegawatan ekonomi sekarang akan berakhir kerana ia adalah di luar kawalan kerajaan dan itulah sebabnya Malaysia telah menegaskan tentang perlunya perubahan dalam sistem perdagangan mata wang.

" Masalahnya ialah kita terlalu banyak menggunakan dolar US dalam menjalankan perdagangan antarabangsa walaupun kita tidak perlu berbuat demikian. Ini memandangkan 70 peratus daripada perdagangan Malaysia dijalankan dalam mata wang itu walaupun perdagangan dengan Amerika hanya merupakan 18 peratus daripada keseluruhan perdagangan negara ini," kata Perdana Menteri.

Dr Mahathir berkata keadaan akan menjadi mudah jika Malaysia menggunakan mata wang negara yang Malaysia mengadakan perdagangan seperti Yen dengan Jepun dan dolar Taiwan.

Dr Mahathir juga berkata firma-firma Taiwan dijangka menyertai secara aktif dalam penubuhan Koridor Raya Multimedia Malaysia.

Dr Mahathir juga ditanya mengenai hubungan antara beliau dan timbalannya Datuk Seri Anwar Ibrahim.

"Tiada percanggahan pendapat antara Anwar dan saya.. kami membuat dasar dan membuat keputusan secara bersama.. yang berbeza ialah saya bersua lantang sementara timbalan saya bersua lembut.

"Tidak timbul percanggahan pendapat seperti digambarkan oleh media Barat dan kedua-dua kami bersama Menteri Tugas-tugas Khas Tun Daim Zainuddin membuat keputusan bersama terutama mengenai ekonomi," kata beliau.

Dr Mahathir juga ditanya mengenai masalah ekonomi Jepun.

Beliau berkata masalah dengan Jepun ialah kurangnya kepercayaan oleh rakyat kepada kerajaan.

" Oleh kerana ini, apa sahaja yang kerajaan lakukan, rakyat tidak mempercayai kerajaan," kata beliau.

Dr Mahathir berkata Jepun harus mempunyai kerajaan yang kuat untuk mengatasi masalah ekonominya dan oleh kerana kerajaan Jepun bertukar selepas dua hingag tahun, tiada kesinambungan dalam programnya.

-- BERNAMA

AKT FAZ